

羣書治要

羣書治要卷第十

秘書監鉅鹿男臣魏徵等奉 勅撰

孔子家語

始誅

孔子爲魯大司寇、朝政七日、而誅亂法大夫少
正卯、戮之于兩觀之下、兩觀、闕也、屍於朝三日、子貢
進曰、夫少正卯、魯之聞人也、今夫子爲政而始
誅之、或者爲失之乎、孔子曰、天下有大惡者五、
而盜竊不與焉、一曰、心逆而臉、二曰、行僻而堅、

三曰言偽而辨、四曰記醜而博、

醜、謂非義

五曰順非

而澤、此五者有一於人、則不免於君子之誅、而

少正卯皆兼有之、其居處足以撮徒成黨、

撮、聚也

其談說足以飾褒熒衆、其強禦足以反是獨立、

此乃人之姦雄也、不可以不除、

孔子爲魯大司寇、有父子訟者、夫子同往執之、

往、獄牢也

三月不別、其父請止、夫子赦焉、季孫聞之、

不悅、曰、司寇欺余、曩告余曰、爲國家者、必先以孝、今戮一不孝、以教民孝、不亦可乎、而又赦之、

則廢至
憚之七
字作卽
廢之又
不可而
後以威

何哉、孔子喟然歎曰、嗚呼、上失其道、而殺其下、非理也、不教以孝、而聽其獄、是殺不辜也、三軍大敗、不可斬也、獄犴不治、不可刑也、何者、上教之不行、罪不在民故也、夫慢令謹誅、賊也、徵斂無時、暴也、不誠責成、虐也、政無此三者、然後刑可卽也、旣陳道德、以先服之、而猶不可、則尚賢以勸之、又不可、則廢不能以憚之、若是百姓正矣、其有邪民不從化者、然後待之以刑、則民咸知罪矣、是以威厲而不誡、刑措而不用也、今世

解之十
三字
誠作

不然亂其教、煩其刑、使民迷惑而陷罪焉、又從而制之、故刑彌繁、而盜不勝也、世俗之陵遲久矣、雖有刑法、民能勿踰乎、

王言

孔子閑居、謂曾子曰、參、汝可語明王之道與、居吾語汝、夫道者、所以明德也、德者、所以尊道也、是故非德、道不尊也、非道德、不明也、雖有國之良馬、不教服乘、不可以取道里、雖有博地衆民、不以其道治之、不可以致霸王、是故昔者明王、

舊無其
題之

內修七教、外行三至、七教修而可以守、三至行而可以征、明王之道、其守也、則必折衝千里之外、其征也、還師衽席之上、故曰、內修七教而上不勞、外行三至而財不費、此之謂明王之道也、曾子曰、不勞不費之爲明王、可得而聞乎、孔子曰、昔者帝舜左禹右皋陶、不下席而天下治、夫如此、何上之勞乎、若乃十一而稅、用民之力、歲不過三日、入山澤以其時而無征、此則生財之路也、而明王節之、何財之費乎、曾子曰、敢問何

謂七教孔子曰上敬老則下益孝上尊齒則下益悌上樂施則下益寬上親賢則下擇友上好德則下無隱上惡貪則下耻爭上廉讓則下知節此之謂七教也七教者治民之本也政教定則本正矣凡上者民之表也表正則何物不正曾子曰道則至矣弟子不足以明之孔子曰參汝以爲姑止此乎昔者明王之治民也有法必裂地而封之分屬而理之然後賢民無所隱暴民無所伏使有司日省而時考之進用賢良退

不肖下
舊有然
字賢下
舊有良
字則之

貶不肖、則賢者悅、而不肖者懼、哀鰥寡、養孤獨、恤貧窮、誘孝悌、選才能、此七者修、則四海之內、無刑民矣、上之親下也、如手足之於腹心、下之親上也、如幼子之於慈母矣、上下相親如此、故令則從、施則行、民懷其德、近者悅服、遠者來附、政之致也、田獵罩弋、罩、掩網也、弋、繳射也、非以盈宮室也、徵斂百姓、非以充府庫也、慘怛以補不足、禮節以損有餘、多信而寡貌、其禮可守、其言可覆、其迹可履、其於信也、如四時、其博有萬民也、如饑

而食如渴而飲、民之信之、如寒暑之必驗也、故
視遠若邇、非道邇也、見明德也、是故兵革不動
而威、用利不施而親、此之謂明王之守、折衝乎
千里之外者也、曾子曰、敢問何謂三至、孔子曰、
至禮不讓而天下治、至賞不費而天下之士悅、
至樂無聲而天下之民和、明王篤行三至、故天
下之君可得而知也、天下之士可得而臣也、天
下之民可得而用也、曾子曰、敢問此義何謂也、
孔子曰、古者明王必盡知天下良士之名、既知

其名、又知其實、既知其實、然後因天下之爵以尊之、此之謂至禮、不讓而天下治、因天下之祿以富天下之士、此之謂至賞、不費而天下之士悅、如此則天下之明譽興焉、此之謂至樂、無聲而天下之民和、故曰、所謂天下之至仁者、能合天下之至親者也、所謂天下之至智者、能用天下之至和、所謂天下之至明者、能舉天下之至賢、此三者咸通、然後可以征、是故仁者莫大於愛人、智者莫大於知賢、政者莫大於官能、有土

之君能修此三者則四海之內供命而已矣夫
明王之所征必道之所廢者是故誅其君而
改其政弔其民而不奪其財故曰明王之征也
猶時雨之降也至則民悅矣是故行施彌博得
親彌衆此之謂還師衽席之上

言安而
無憂也

大婚

孔子侍坐於哀公公問曰敢問人道誰爲大孔
子對曰夫人道政爲大夫政者正也君爲正則
百姓從而正矣君之所爲百姓之所從也君之

不爲百姓何從、公曰、敢問爲政如之何、孔子對

曰、夫婦別、父子親、君臣信、三者正、則庶物從之

矣、內以治宗廟之禮、足以配天地之神也、出以

治直言之禮、足以立上下之敬也、

夫婦正、則出可以治政、言

禮矣、身正乃可以正人矣、

物耻則足以振之、

耻事不知、禮則足以振教之也、

國耻則足以興之、

耻國不如、禮則足以興起之、

故爲政先乎

禮、禮其政之本與、孔子遂言曰、昔三代明王之

必敬妻子也、蓋有道焉、妻也者、親之主也、子也

者、親之後也、敢不敬與、是故君子無不敬也、敬

也者、敬身爲大身也者、親之支也、敢不敬與、不敬其身、是傷其親、傷其親、是傷其本也、傷其本、則支從而亡、三者、百姓之象也、

言百姓之所法而行

身以

及身、子以及子、妃以及妃、君修此三者、則大化

愾于天下、

愾、滿也

公曰、敢問何謂敬身、孔子對曰、

君子過言則民作辭、過動則民作則、言不過辭、動不過則、百姓恭敬以從命、若是則可謂能敬其身、能敬其身、則能成其親矣、公曰、何謂成親、孔子對曰、君子者、乃人之成名也、百姓與名、謂

之君子則是成其親爲君而爲其子也孔子遂
言曰爲政而不能愛人則不能成其身不能成
其身則不能安其土不能安其土則不能樂天
不能樂
天道也不能樂天則不能成身公曰敢問何謂
成身孔子對曰夫其行已不過于物謂之成身
不過于物合天道也

問禮

哀公問於孔子曰大禮何如子之言禮何其尊
也孔子曰仁聞之民之所以生者禮爲大非禮

則無以節事天地之神焉、非禮、則無以辨君臣
上下長幼之位焉、非禮、則無以別男女父子兄
弟婚姻親族疎數之交焉、是故君子此爲之尊
儆、然後以其所能教示百姓、卑其宮室、節其服
御、車不雕璣、器不雕鏤、食不二味、心不淫志、以
與萬民同利、古之明王之行禮也如此、公曰、今
之君子、胡莫之行也、孔子對曰、今之君子、好利
無厭、淫行不倦、荒怠慢遊、固民是盡、以遂其心、
以怨其政、以伐有道、求得當欲、不以其所

言苟
求得

當其情
欲而已

虐殺刑誅、不以其理、夫昔之用民也由

前

用上
所言

今之用民也由後

用下
所言

是卽今之君子

莫能爲禮也

五儀

哀公問於孔子曰、寡人欲論魯國之士、與之爲
治、敢問如何取之、孔子曰、人有五儀、有庸人、有
士人、有君子、有賢、有聖、審此五者、則治道畢矣、
所謂庸人者、心不存慎終之規、口不吐訓格之
言、格、法也、不擇賢以託其身、不力行以自定、見小

闇大而不知所務、從物如流、而不知所執、此則

庸人也、所謂士人者、心有所定、計有所守、雖不

能盡道術之本、必有率也、率、猶述也、雖不能備百善

之美、必有處也、是故智不務多、務審其所知、言

不務多、務審其所謂、所謂者、謂言之要也、行不務多、務審

其所由、智既知之、言既得之、得其要也、行既由之、則

若性命形骸之不可易也、富貴不足以益、貧賤

不足以損、此則士人也、所謂君子者、言必忠信、

而心不怨、忍怨害也、仁義在身、而色不伐、無伐善之色也、思

慮通明而辭不專、篤行信道、自強不息、油然若

將可越而終不可及者、此君子也、油然、不進之貌、越、過所

謂賢者、德不踰閑、閑、猶去也行中規繩、言足法於天

下而不傷於身、言滿天下、無口過也道足化於百姓而不

傷於本、本亦謂身富則天下無宛財、宛、積也施則天下

不病貧、此賢者也、所謂聖者、德合天地、變通無

方、窮萬事之終始、協庶品之自然、敷其大道而

遂成情性、明並日月、化行若神、下民不知其德、

覩者不識其隣、此聖者也、隣、以喻畔界也公曰、善哉、非

子之賢則寡人不得聞此言也雖然寡人生於
深宮之中長於婦人之手未嘗知哀未嘗知憂
未嘗知勞未嘗知懼未嘗知危恐不足以行五
儀之教若何孔子曰君入廟而右登自阼階仰
視榱桷俯察机筵其器皆存而不覩其人君以
此思哀則哀可知矣昧爽夙興正其衣冠也昧爽明
明始明也夙早也興起也平旦視朝慮其危難一物失理亂
亡之端君以此思憂則憂可知矣日出聽政至
乎中昃中昃中也昃日昃也諸侯子孫往來爲賓行禮揖

讓、慎其威儀、君以此思勞、則勞可知矣、緬然長

思、出乎四門、周章遠望、覩亡國之墟、必將有數

焉、

言亡國故墟、非但一也、

君以此思懼、則懼可知矣、夫君

者舟也、民者水也、水所以載舟、亦所以覆舟、君

以此思危、則危可知矣、既明此五者、而又少留

意於五儀之事、則於政治乎何有失哉、

哀公問於孔子曰、請問取人之法、孔子對曰、事

任之官、

言各當以其所能之事、任之於官也、

無取捷捷、無取鉗鉗、

鉗、妄對、不謹誠、

無取啍啍、

啍、啍、多言也、

捷捷、貪也、

捷捷而不良、所以爲

貪鉗鉗亂也、噶噶誕也、

誕欺詐也

故弓調而後求勁

焉、馬服而後求良焉、士必慤而後求智能焉、不

慤而多能、譬之豺狼、不可通也、

通近也、言人無智能者、雖不慤

信不能為大惡也、不慤信而有智能者、然後乃可畏也、

哀公問於孔子曰、夫國家之存亡禍福、信有天

命、非唯人耶、孔子對曰、存亡禍福、皆在已而已、

天灾地妖、弗能加也、昔者殷王帝辛之世、

帝辛紂也

有雀生大鳥於城隅焉、帝辛介雀之德、

介助也、以雀之

德為助也

不修國政、殷國以亡、此即以已逆天時、得

殷下有
正字

福反爲禍者也、又其先世殷太戊之時、道缺法
邪、以致天孽、桑穀生朝、七日大拱、太戊恐駭、側
身修行、三年之後、遠方慕義、重譯至者十有六
國、此卽以己逆天時、得禍轉爲福者也、故天灾
地妖、所以儆人主也、寤夢徵怪、所以儆人臣也、
也、或灾妖不勝善政、夢怪不勝善行、能知此、至
治之極也、明王達此也、

致思

季羔爲衛士師

士師
獄官

、別人之足、俄而衛有亂、季

羔逃之、則者守門焉、謂季羔曰、彼有缺、季羔曰、

君子不踰、又曰、彼有竇、季羔曰、君子不隧、

隧從竇出

又曰、於此有室、季羔入焉、旣而追者罷、季羔將去、謂則者曰、吾不能虧主之法、而親則子之足、今吾在難、此正子報怨之時、而子逃我、何故、則者曰、斷足故我之罪也、無可奈何、曩者君治臣以法令、先人後臣、欲臣之免也、臣知之、獄決罪定、臨當論刑、君愀然不樂、見於顏色、臣又知之、君豈私臣哉、天生君子、其道故然、此臣之所以

悅君也。孔子聞之曰：善哉！爲吏其用法一也。思
仁恕則樹德，加嚴暴則樹怨。公以行，其子羔乎？
子路爲蒲宰，爲水備，修溝瀆，以民之煩苦也。人
與一簞食，一壺漿，孔子止之。子路曰：由也以民
多匱餓者，匱，乏也。是以與之簞食壺漿，而夫子使
止之，是夫子止由之行仁也。孔子曰：爾以民爲
餓，何不自白於君，發倉廩以給之，而私以爾食饋
之？是汝明君之無惠也。速已則可，不已則爾之
見罪必矣。

子貢問治民於孔子、孔子曰、懔懔焉如以腐索

御扞馬、

懔懔焉、誠懼之貌、扞馬、突馬也。

子貢曰、何其畏也、孔子

曰、夫通達之屬皆人也、以道導之、則吾畜也、不以道導之、則吾讎也、若之何其無畏也、

三恕

孔子曰、君子有三恕、有君弗能事、有臣而求其使、非恕也、有親弗能孝、有子而求其報、非恕也、有兄弗能敬、有弟而求其順、非恕也、士能明於三恕之本、則可謂端身矣、

端正也。

孔子觀於魯桓公之廟、有欹器焉、孔子問於守
廟者曰、此爲何器、對曰、此蓋爲宥坐之器、孔子
曰、吾聞宥坐之器、虛則欹、中則正、滿則覆、明君
以爲誠、故置於坐側也、顧謂弟子曰、試注水焉、
水實之、中則正、滿則覆、夫子喟然歎曰、嗚呼、夫
物惡有滿而不覆者哉、子路進曰、敢問持滿有
道乎、子曰、聰明叡智、守之以愚、功被天下、守之
以讓、勇力振世、守之以怯、富有四海、守之以謙、
此所謂損之又損之之道也、

好生

哀公問於孔子曰、昔者舜冠何冠乎、孔子不對、
公曰、寡人問於子、而子無言、何也、孔子曰、以君
之問、不先其大者、故方思所以爲對焉、公曰、其
大何乎、孔子曰、舜之爲君也、其政好生而惡殺、
其任授賢而替不肖、德若天地之虛靜、化若四
時之變物、是以四海承風、暢於異類、異類、四方
之夷狄也、鳳翔麟至、鳥獸馴德、馴、順
也、無他、好生故也、君舍
此道、而冠冕是問、是以緩對、

觀周

孔子觀於明堂、覩四方之墉、墉、墻也。有堯舜桀紂之

象、而各有善惡之狀、興廢之誡焉、又有周公相

成王、抱之而負斧戣、南面以朝諸侯之圖焉、孔

子徘徊而望之、謂從者曰、此則周之所以盛也、

夫明鏡者、所以察形、往古者、所以知今、人主不

務襲跡於其所、以安存、而忽怠於所以危亡、是

猶未有以異於却步而欲求及前人也、豈非惑

哉、

怠於下
有其字

孔子觀周、遂入大祖后稷之廟、廟堂右階之前、

有金人焉、參緘其口而銘其背曰、古之慎言人

也、戒之哉、無多言、多言多敗、無多事、多事多患、

安樂必誠、雖處安樂必警誠也、無行所悔、所悔之事不可復行、勿謂

何傷、其禍將長、勿謂何害、其禍將大、勿謂不聞、

神將伺人、罔罔不滅、炎炎若何、涓涓不壅、終爲

江河、緜緜不絕、或成網羅、緜緜微而不絕則有成網羅者、豪末

不扎、如豪之末言微也扎拔也、將尋斧柯、尋用、誠能慎之、福之

根也、口是何傷、禍之門也、強梁者不得其死、好

勝者必遇其敵、盜憎主人、民惡其上、君子知天下之不可上也、故下之、知衆人之不可先也、故後之、溫恭慎德、使人慕之、執雌持下、人莫踰之、人皆趣彼、我獨守此、人皆惑惑、我獨不徙、惑惑東西內藏我智、不示人技、我雖尊高、人弗我害、轉移之貌唯能於此、天道無親、常與善人、戒之哉、戒之哉、孔子既讀斯文、顧謂弟子曰、小子志之、此言實而中、情而信、

賢君

哀公問於孔子曰、當今之君、孰爲最賢、孔子對曰、丘未之見也、抑有衛靈公乎、公曰、吾聞其閨門之內無別、而子次之賢、何也、孔子對曰、臣語其朝廷行事、不論其私家之際也、公曰、其事如何、孔子曰、靈公之弟曰公子渠牟、其智足以治千乘、其信足以守之、靈公愛而任之、又有士曰王林國者、見賢必進之、而退與分其祿、是以衛國無遊放之士、靈公知而尊之、又有士曰慶足者、國有大事、則必起而治之、國無事、則退而容

賢

言其所以退欲以容賢於朝

靈公悅而敬之、又有大夫史

鰭、以道去衛、而靈公郊舍三日、琴瑟不御、必待史鰭之入而後敢入、臣以此取之、雖次之賢、不亦可乎、

子貢問孔子曰、今之人臣、孰爲賢乎、子曰、齊有鮑叔、鄭有子皮、則賢者矣、子貢曰、齊無管仲、鄭無子產乎、子曰、賜、汝徒知其一、未知其二也、汝聞用力爲賢乎、進賢爲賢乎、子貢曰、進賢賢哉、子曰、然、吾聞鮑叔達管仲、子皮達子產、未聞二

子之達賢已之才者也

哀公問於孔子曰、寡人聞忘之甚者、徙而忘其妻、有諸、孔子對曰、此猶未甚者、甚者乃忘其身、公曰、可得聞乎、孔子曰、昔夏桀貴爲天子、富有四海、忘其聖祖之道、壞其典法、絕其世祀、荒乎淫樂、沈湎于酒、佞臣諂諛、窺導其心、忠士鉗口、逃罪不言、杜鉗口、天下誅桀而有其國、此之謂忘其身之甚者也

子路問於孔子曰、賢君治國、所先者何在、孔子

曰、在於尊賢而賤不肖、子路曰、由聞晉中行氏尊賢而賤不肖矣、其亡何也、子曰、中行氏尊賢而弗能用、賤不肖而不能去、賢者知其不己用而怨之、不肖者知其必已賤而讎之、怨讎並存於國、隣敵構兵於郊、中行氏雖欲無亡、豈可得乎、

哀公問政於孔子、孔子對曰、政之急者、莫大乎使民富且壽也、公曰、爲之奈何、孔子曰、省力役、薄賦歛、則民富矣、敦禮教、遠罪疾、則民壽矣、公

曰寡人欲行夫子之言、恐吾國貧矣、孔子曰、詩不云乎、愷悌君子、民之父母、未有其子富而父母貧者也、

衛靈公問孔子曰、有語寡人、爲國家者、計之於廟堂之上、則政治矣、何如、孔子曰、其可也、愛人者、則人愛之、惡人者、則人惡之、知得之己者、則知得之人、所謂不出環堵之室而知天下者、知反己之謂也、

辨政

子貢爲信陽宰、將行、孔子曰、勤之慎之、奉天之
時、無奪無伐、無暴無盜、子貢曰、賜也少而事君
子、豈以盜爲累哉、孔子曰、而未之詳也、夫以賢
代賢、是之謂奪、以不肖代賢、是之謂伐、緩令急
誅、是之謂暴、取善自與、是之謂盜、盜非竊財之
謂也、吾聞之、知爲吏者、奉法以利民、不知爲吏
者、枉法以侵民、此怨所由生也、匿人之善、斯謂
蔽賢、揚人之惡、斯謂小人、內不相訓而外相謗、
非親睦也、言人之善、若己有之、言人之惡、若己

受之故君子無所不慎焉

六本

孔子曰行已有六本焉然後爲君子立身有義
矣而孝爲本喪紀有禮矣而哀爲本戰陣有列
矣而勇爲本治政有理矣而農爲本居國有道
矣而嗣爲本繼嗣不立則亂之源也生財有時矣而力爲
本置本不固無務豐末親戚不悅無務外交事
不終始無務多業反本修遠君子之道也

孔子曰藥酒苦於口而利於病忠言逆於耳而

其無作
無其

利於行、湯武以譎譎而昌、桀紂以唯唯而亡、君
無爭臣、父無爭子、兄無爭弟、士無爭友、其無過
者、未之有也、故曰、君失之、臣得之、父失之、子得
之、兄失之、弟得之、士失之、友得之、是以國無危
亡之兆、家無悖亂之惡、父子兄弟無失、而交友
無絕、

孔子讀易、至於損益、喟然而歎、子夏避席問曰、
夫子何歎焉、孔子曰、夫自損者、必有益之、自益
者、必有決之、吾是以歎也、子夏曰、然則學者不

可以益乎、子曰、非道益之謂也、道彌益而身彌損、夫學者損其自多、以虛受之、天道成而必變、凡持滿而能久者、未嘗有也、故曰、自賢者、則天下之善言、不得聞其耳矣、

孔子曰、以富貴而下人、何人不與、以富貴而愛人、何人不親、發言不逆、可謂知言矣、

孔子曰、吾死之後、則商也日益、賜也日損、曾子問曰、何謂也、子曰、商也好與賢已者處、賜也好悅不如已者、不知其子、視其父、不知其人、視其

友不知其君、視其所使、故曰、與善人居、如入芝蘭之室、久而不聞其香、卽與之化矣、與不善人居、如入鮑魚之肆、久而不聞其臭、亦與之化矣、是以君子必慎其所與者焉、

哀公問政

哀公問政於孔子、孔子對曰、文武之政、布在方策、其人存、則其政舉、其人亡、則其政息、故爲政在於得人、取人以身、修身以道、修道以仁、仁者人也、親親爲大、義者宜也、尊賢爲大、親親之殺、

尊賢之等、禮所生也、是以君子不可以不修身、
思修身、不可以不事親、思事親、不可以不知人、
思知人、不可以不知天、天下之達道有五、其所
以行之者三、曰、君臣也、父子也、夫婦也、昆弟也、
朋友之交也、五者、天下之達道也、智仁勇三者、
天下之達德也、所以行之者一也、或生而知之、
或學而知之、或困而知之、及其知之一也、或安
而行之、或利而行之、或勉強而行之、及其成功
一也、好學近於智、力行近於仁、知耻近於勇、知

斯三者則知所以修身、知所以修身則知所以治人、知所以治人則能成天下國家矣。公曰：政其盡此而已乎？孔子曰：凡爲天下國家者有九經焉。曰：修身也、尊賢也、親親也、敬大臣也、體羣臣也、子庶人也、來百工也、柔遠人也、懷諸侯也。修身則道立、尊賢則不惑、親親則諸父昆弟不怨、敬大臣則不眩、體羣臣則士之報禮重、子庶民則百姓勸、來百工則財用足、柔遠人則四方歸之、懷諸侯則天下畏之。公曰：爲之奈何？孔子

曰齊莊盛服非禮不動所以修身也去讒遠色

賤貨而貴德所以尊賢也爵其能重其祿同其

好惡所以篤親親也官盛任使所以敬大臣也

盛其官任而使之也忠信重祿所以勸士也忠信者與之重祿也時

使薄歛所以子百姓也日省月考既稟稱事所

以來百工也既稟食之各當其職事也送往迎來嘉善而矜

不能所以綏遠人也綏安也繼絕世舉廢邦朝聘

以時厚往而薄來所以懷諸侯也治天下國家

有九經焉其所以行之者一也凡事豫則立不

豫則廢言前定則不跲躓事前定則不困行前

定則不疚疚道前定則不窮公曰子之教寡人

備矣敢問行之所始孔子曰立愛自親始教民
睦也立敬自長始教民順也教以慈睦而民貴
有親教以敬長而民貴用命民既孝於親又順
以聽命措諸天下無所不行

顏回

魯定公問於顏回曰子亦聞東冶畢之善御乎
對曰善則善矣雖然其馬將必逸公不悅其後

三日東冶畢之馬逸公聞之促駕召顏回顏回至公曰前日寡人問吾子以東冶畢之善御而子曰其馬將逸不識吾子奚以知之顏回對曰以政知之而已矣昔者帝舜巧於使民而造父巧於使馬舜不窮其民力造父不窮其馬力是以舜無逸民造父無逸馬今東冶畢之御也歷嶮致遠馬力盡矣然而其心猶求馬不已臣以此知之公曰善哉吾子之言其義大矣願少進乎顏回曰臣聞之鳥窮則喙獸窮則攫人窮則

詐馬窮則逸、自古及今、未有窮其下而能無危者也、公悅、

困誓

衛蘧伯玉賢、而靈公不用、彌子瑕不肖、而反任之、史魚驟諫、公不從、史魚病將卒、命其子曰、吾在公朝、不能進蘧伯玉、退彌子瑕、是吾爲臣不能正君也、生而不能正君、死不可以成禮矣、吾死、汝置屍牖下、於我畢矣、畢猶足也、禮殯於客位、其子從之、靈公弔焉、怪而問之、其子以其父言告公、公

愕然失容曰、是寡人之過也、於是命之殯於客位、進蘧伯玉而用之、退彌子瑕而遠之、孔子聞之曰、古之烈諫者、死則已矣、未有若史魚死而屍諫、忠感其君者也、可不謂直乎、

執轡

閔子騫爲費宰、問政於孔子、孔子曰、以德以法、夫德法者、御民之具、猶御馬之有銜勒也、君者、人也、吏者、轡也、刑者、策也、人君之政、執其轡策而已矣、子騫曰、敢問古之爲政、孔子曰、古者天

子以內史爲左右手、以德法爲銜勒、以百官爲轡、以刑罰爲策、以萬民爲馬、故御天下數百年而不失、善御馬者、正銜勒、齊轡策、均馬力、和馬心、故口無聲而馬應、轡策不舉而極千里、極至也

善御民者、一其德法、正其百官、均齊民力、和安民心、故令不再而民順從、刑不用而天下化治、是以天地德之、天地以爲有德、而兆民懷之、懷歸、不能御

民者、弃其德法、專用刑辟、譬猶御馬、弃其銜勒、而專用箠策、其不可制也必矣、夫無銜勒而用

舊無法
字補之
已下舊
有而字

策馬必傷、車必敗、無德法而用刑辟、民必流、
國必亡、凡治國而無德法、則民無所法修、民無
所法修、則迷惑失道、古之御天下者、以六官總
治焉、六官在手、以爲轡、故曰、御四馬者、執六轡、
御天下者、正六官、是故善御馬者、正身以總轡、
均馬力、齊馬心、迴旋曲折、唯其所之、故可以取
長道、可以趣急疾、此聖人所以御天地與人事
之法則也、天子以內史爲左右手、以六官爲轡、
已與三公、執六官、均五教、齊五法、

仁義禮智
信之法也故

亦唯其所引、無不如志、

五刑

冉有問於孔子曰、先王制法、使刑不上於大夫、
禮不下於庶人、然則大夫之犯罪、不可以加刑、
庶人之行事、不可以治禮乎、孔子曰、不然、凡治
君子、以禮義御其心、所以厲之以廉耻之節也、
故古之大夫、其有坐不廉、污穢而退放之者、則
曰簠簋不飾、齊飾整有坐淫亂、男女無別者、則曰
帷薄不修、有坐罔上不忠者、則曰臣節未著、有

坐疲軟不勝任者則曰下官不職

言其下官不務其職不斥

其身也

有坐于國之紀者則曰行事不請

言不請而擅行

也

此五者大夫既自定有罪名矣而猶不忍斥

然正以呼之也既而爲之諱所以愧耻之是故

大夫之罪其在五刑之域者譴發則白冠鵲纓

盤水加劔造于闕而自請罪君不使有司執縛

牽掣而加之也其有大罪者聞命則北面再拜

跪而自裁君不使人捽引而刑殺之也曰子大

夫自取之耳吾遇子有禮矣是以刑不上大夫

而大夫亦不失其罪者、教使然也、凡所謂禮不下庶人者、以庶人遽其事而不能充禮、故不責之以備禮也、

刑政

仲弓問於孔子曰、雍聞、至刑無所用政、至政無所用刑、至刑無所用政、桀紂之世是也、至政無所用刑、成康之世是也、信乎、孔子曰、聖人之治化也、必刑政相參焉、太上以德教民、而以禮齊之、其次以政導民、以刑禁之、化之弗變、導之弗

從傷義敗俗於是乎用刑矣仲弓曰古之聽訟可得聞乎孔子曰凡聽五刑之訟必原父子之親立君臣之義以權之意論輕重之序慎測淺深之量以別之悉其聰明致其忠愛以盡之大

司寇正刑明辟以察獄獄必三訊焉

一曰訊群臣二曰訊

群吏三曰訊萬民也

有指無簡則不聽

簡誠也有其意無其誠者不論以為

罪

附從輕赦從重

附人之罪以輕為比赦人之罪以重為比

疑獄則

汎與衆共之衆疑赦之故爵人必於朝與衆共之也刑人必於市與衆弃之也古者公家不畜

刑人、大夫不養也、士遇之塗、弗與之言也、屏諸

四方、唯其所之、弗及以政、弗欲生之故也、仲弓

曰、聽獄、獄之成、成何官、孔子曰、獄成於吏、吏以

獄之成告於正、吏、獄官、吏也、正、獄官長、正既聽之、乃告於

大司寇、大司寇聽之、乃奏於王、王命三公卿士

參聽棘木之下、外朝之法、左九棘、孤卿大夫位焉、右九棘、公侯伯子男位焉、面

三槐、三公位焉、然後乃以獄之成報于王、王以三宥之

法聽之、君王尚寬、罪雖已定、猶三宥之、不可得輕、然後刑之也、而後制刑

焉、所以重之也、仲弓曰、古之禁何禁、孔子曰、析

言破律

巧賣法令者也

亂名改作

變易官與物名

執左道以亂

政者殺

左道邪道

作淫聲

淫逸惑亂之聲

造異服

非人所設常見

奇伎奇器以盪上心者殺

怪異之伎可以眩曜人心之器盪動也

行偽而堅

行詐偽而堅守

言偽而辯學非而博順非而

澤

順其非而滑澤之

以惑衆者殺假於鬼神時日卜筮

以疑民者殺此四誅者不待時不以聽

不聽於棘木之

下也

問玉

子張問聖人之所以教孔子曰師乎吾語汝聖

人明於禮樂、舉而措之而已。子張又問。孔子曰、師爾以爲必布几筵、揖讓升降、酌獻酬酢、然後謂之禮乎、爾以爲必行綴兆、執羽籥、作鐘鼓、然後謂之樂乎、言而可履、禮也、行而可樂、樂也、聖人力此二者、以恭己南面、是故天下太平、萬國順服、百官承事、上下有禮也。夫禮之所興、衆之所以治也、禮之所廢、衆之所以亂也。昔者明王聖主之辨貴賤、長幼、正男女、外內、序親疏、遠邇、而莫敢相踰越者、皆由此塗出也。

屈節

宓子賤爲單父宰、恐魯君聽讒人、使已不得行其政、於是辭行也、故請君之近史二人、與之俱至官、宓子賤戒其邑吏、令二史書、方書掣其肘、書不善、則從而怒之、二史患焉、辭請歸魯、君以問孔子、孔子曰、宓不齊君子也、意者其以此諫乎、公寤、大息而嘆曰、此寡人之不肖也、寡人亂宓子之政、而責其善者數矣、微二史、則寡人無以知過、微夫子、則寡人無由寤、遽使告宓子曰、自

定作哀
今日以往、單父非吾有也、從子之制、有便於民者、子決爲之、五年一言其要、宓子遂得行政於單父焉、躬敦厚、明親親、尚篤敬、施至仁、加懇誠、致忠信、百姓化之、

正論

定公問於孔子曰、大夫皆勸寡人、使隆敬於高年、可乎、孔子對曰、君之及此言也、將天下實賴之、豈惟魯而已哉、公曰、何也、孔子曰、昔者有虞氏貴德而上齒、夏后氏貴爵而上齒、殷人貴富

而上齒

富謂世祿之家

周人貴親而上齒虞夏殷周天

下之盛王也未有遺年者焉年之貴于天下久

矣次于事親是故朝廷同爵則上齒七十杖於

朝君問則席

君欲問之則為之設席

八十不仕朝君問則

就之而悌達於朝廷矣其行也肩而不並

不敢與長

者並肩也

不錯則隨

錯鴈行也父黨隨行兄黨鴈行

見老者則車從

避

見老者在道車與步皆避之也

斑白者不以其任行於路

任擔

也少者代之也

而悌達於道路矣居鄉以齒而老窮不

匱強不犯弱衆不暴寡而悌達於州巷矣古之

道五十不爲甸役

五十始老不從力役之事不及田獵之徒也

頒禽

隆諸長者而憊達於蒐狩矣軍旅什伍同爵則上齒而憊達于軍旅矣夫聖王之教孝悌發諸朝廷行于道路至于剗巷放于蒐狩修于軍旅則衆同以義死之而弗敢犯也公曰善

哀公問於孔子曰寡人聞之東益不祥

東益東益宅也

信有之乎孔子曰不祥有五而東益不與焉夫損人而自益身之不祥也弃老而取幼家之不祥也釋賢而用不肖國之不祥也老者不教幼

者不學、俗之不祥也、聖人伏匿、愚者擅權、天下不祥也、故不祥有五、而東益不與焉、

子夏問

子夏問於孔子曰、記云、周公相成王、教之以世子之禮、有諸、孔子曰、昔者成王嗣立、幼、未能蒞祚、周公攝政而治、抗世子之法於伯禽、欲成王之知父子君臣之道、所以善成王也、夫知爲人子者、然後可以爲人父、知爲人臣者、然後可以爲人君、知事人者、然後可以使人、是故抗世子

法於伯禽使之與成王居使成王知父子君臣
長幼之義焉

羣書治要卷第十

羣書治要卷第十一

秘書監鉅鹿男臣魏徵等奉 勅撰

史記上

木紀

黃帝者、少典之子、姓公孫、有熊國君少典之子也、名曰軒

轅、生而神靈弱而能言、幼而侑齊、侑疾也、齊速也、言聖德幼

而疾速也、長而敦敏、成而聰明、神農氏世衰、諸侯相

侵伐、而神農氏弗能征、於是軒轅乃習用干戈、

修德振兵、以與炎帝戰于阪泉之野、阪泉地名、三戰

然後得其志蚩尤作亂乃殺蚩尤而代神農氏

是為黃帝東至于海西至于空桐山名也在隴右南至

于江北逐葷粥儉狁也邑于涿鹿之阿遷徙往來

無常處以師兵為營衛置左右大監監于萬國

舉風后力牧常先大鴻以治民順天地之紀時

播百穀勞勤心力耳目節用水火材物有土德

之瑞故號黃帝帝王世紀曰神農氏衰蚩尤氏叛不用帝命黃帝於是脩德撫

民始垂衣裳以班上下剡木為舟剡木為楫舟

擊旂以待暴客斷木為杵掘地為臼杵臼之用

以利萬人弦木為弧剡木為矢弧矢之利以威

天下諸侯咸叛神農而歸之、討蚩尤氏、禽之于涿鹿之野、諸侯有不服者、從而征之、凡五十二戰、而天下大服、俯仰天地、置衆官、故以風后配上台、天老配中台、五聖配下台、謂之三公、其餘地典、力牧、常先、大鴻等、或以爲師、或以爲將、分掌四方、各如已視、故號曰黃帝四目、又使岐伯、葷味、草木、典醫疾、今經方本草之書咸出焉、其史倉頡、又象鳥迹、始作文字、自黃帝以上、穴居而野處、死則厚衣以薪、葬之中野、結繩以治、及至黃帝、爲築宮室、上棟下宇、以待風雨、而易以棺槨、制以書契、百官以序、萬民以察、神而化之、使民不倦、後作雲門咸池之樂、周禮所謂大咸者也、於是人事畢具、黃帝在位百年而崩、年百一十歲矣、或傳以爲仙、或言壽三百年、故宰我疑以問孔子、孔子曰、民賴其利、百年而崩、民畏其神、百年而亡、民用其教、百年而移、故曰三百

年

帝顓頊高陽者黃帝之孫昌意之子也養材以

任地載時以象天依鬼神以制義治氣以教化

絜誠以祭祀北至于幽陵南至于交趾西濟於

流沙東至於蟠木東海中有山焉名度索上動有大桃樹屈蟠三千里也動

靜之物大小之神日月所照莫不砥屬砥平也四遠皆

平而來服屬也帝王世紀曰帝顓頊平九黎之亂使南正重司天以屬神火正黎司地以屬民

於是民神不雜萬物有序

帝嚳高辛者高陽高辛皆所興地名也顓頊與嚳以字為號上古質故也黃

帝之曾孫也生而神靈聰以知遠明以察微仁

而威惠而信、修身而天下服、取地之財而節用之、撫教萬民而利誨之、歷日月而迎送之、明鬼神而敬事之、其色郁郁、其德嶷嶷、其動也時、其服也士、日月所照、風雨所至、莫弗從服。帝王世

譽以人事紀官、故以句芒爲木正、祝融爲火正、蓐收爲金正、元冥爲水正、后土爲土正、是五行之官、分職而治、

帝堯放勛、其仁如天、其智如神、就之如日、望之

如雲、富而不驕、貴而不舒、

帝王世紀曰、帝堯置欲諫之鼓、命羲和四

子羲仲、羲叔和仲和叔、分掌四時、方嶽之職、故名徵、天下大和、百姓無事、有五老人、擊壤於道、

觀者歎曰大哉堯之德也老人曰日出而作日入而息鑿井而飲耕田而食帝力何有於我哉墨子以爲堯堂高三尺土墻三等茅茨不剪桷椽不斲夏服葛衣冬服鹿裘

虞舜名曰重華父瞽叟頑母嚚弟象傲皆欲殺舜舜順適不失子道以孝聞於是堯乃以二女妻舜以觀其內使九男與處以觀其外二女不敢以貴驕九男皆益篤舜耕歷山歷山之人皆讓畔漁雷澤雷澤上人皆讓居陶河濱河濱器皆不苦窳也一年而所居成聚二年成邑三年成都於是堯乃試舜五典百官皆治以揆百

事莫不時序、流四凶族、以禦魘魅、堯乃使舜攝

行天子政、堯崩、天下歸舜、

帝王世紀曰、舜立、講

古者三皇五帝、設防而不犯、故無陷刑之罪、是以或結繩而治、或象畫而化、自庖犧至于堯舜、神道設教、可謂至政、無所用刑矣、夫三載考績、黜陟幽明、善無微不著、惡無隱不章、任自然以誅賞、委羣心以就制、故能造御乎無爲、運道於至和、百姓日用而不知、含德若自有者也、詩云、上天之載、無聲無臭、其斯之謂乎、

夏禹、名曰文命、當堯之時、洪水滔天、舜登用、乃命禹平水土、勞身焦思、居外十三年、過家門不敢入、薄衣食、致孝于鬼神、卑宮室、致費於溝洫、

以開九州、通九道、陂九澤、度九山、行相地、宜所

有、以貢、東漸于海、西被于流沙、朔南暨

朔北聲方也

教、訖于四海、於是帝錫禹元圭、以告成功于天

下、於是大平治、帝舜薦禹於天、舜崩、遂卽天子

位、國號曰夏后、十七世、帝履癸立、是爲桀、不務

德、而武傷百姓、百姓弗堪、湯脩德、諸侯皆歸湯

湯遂伐桀、桀走鳴條、

南夷地名

遂放而死

湯始居亳、征諸侯

爲夏方伯得專征伐

葛伯不祀、湯始伐

之、湯曰、予有言、人視水、視形、視民、知治、不、伊尹

曰明哉言能聽道廼進君國子民爲善者在王
官勉哉勉哉湯出見野張網四面祝曰自天下
四方皆入吾網湯曰嘻盡之矣乃去其三面祝
曰欲左左欲右右不用命乃入吾網諸侯聞之
曰湯德至矣及禽獸當是時夏桀爲虐政淫荒
湯乃伐桀踐天子位帝太戊立伊陟爲相伊陟伊尹也
亳有祥桑穀共生於朝一暮大拱二木合生
太戊懼問伊陟曰臣聞妖不勝德帝之政
其有關與帝其修德太戊從之而祥桑枯死殷

復興故稱中宗帝辛立天下謂之紂帝紂資辨
捷疾聞見甚敏材力過人手格猛獸智足以拒
諫飾是非之端矜人臣以聲以爲皆出已之下
好酒淫樂嬖於婦人愛姐已有蘇氏美女也姐已之言
是從於是使師涓作新淫聲北里之舞靡靡之
樂厚賦稅以實鹿臺之錢鹿臺在朝歌城中也而盈鉅橋
之粟鉅橋鹿水之大橋也有漕粟益收狗馬奇物充伋官室
益廣沙丘苑臺沙丘在鉅鹿東北多取野獸飛鳥置其
中慢於鬼神以酒爲池懸肉爲林使男女僕相

逐其間、爲長夜之飲、百姓怨望、而諸侯有叛者、

於是紂廼重辟刑、有炮烙之法、

膏銅柱、加之炭上、令有罪者行

焉、輒墮炭中、姐已笑、名曰炮烙之刑也、

以西伯昌九侯

鄴縣有九侯城、鄂

侯爲三公、九侯有好女、入之紂、九侯女不熹淫

紂、怒殺之、而醢九侯、鄂侯爭之強、并脯鄂侯、西

伯昌聞之、竊歎、紂囚西伯、姜里

河內湯陰有姜里城

西伯

之臣、閔夭之徒、求美女奇物善馬以獻紂、紂廼

赦西伯、用費中爲政、費中善諛好利、殷人弗親、

又用惡來、善毀譏、諸侯以此益疏、多叛紂、微子

魯脫古
卒至
字歷卒
字神

數諫不聽、廼遂去、比干強諫、紂怒、剖比干觀其
心、箕子懼、廼詳狂爲奴、紂又囚之、周武王於是
遂率諸侯伐紂、紂走、衣其寶玉衣、赴火而死、武
王遂斬紂頭、懸之白旗、殺妲己、殷民大悅、

周后稷名弃、好耕農、天下得其利、有功、封於邵、
曾孫公劉修后稷之業、民賴其慶、古公復修后
稷公劉之業、積德行義、國人皆戴之、古公卒、季
尸立、季歷卒、子昌立、是爲西伯、西伯遵后稷公
劉之業、則古公之法、敬老慈少、禮下賢者、日中

不暇食以待士士以此多歸之諸侯皆來決平於是虞芮之人有獄不能決乃如周入界耕者皆讓畔民俗皆讓長虞芮皆慙俱讓而去諸侯聞之曰西伯蓋受命之君也武王卽位太公望爲師周公旦爲輔召公畢公之徒左右王師修文王緒業聞紂昏亂暴虐滋甚於是伐紂紂師皆倒兵以戰武王遂入斬紂散鹿臺之錢發鉅橋之粟以振貧弱封諸侯班賜殷之器物縱馬於華山之陽放牛於桃林之墟偃干戈振兵釋

旅

入曰振旅也

示天下不復用成康之際天下安寧

刑措四十餘年不用

措者置也民不犯法無所置刑也

穆王即

位將征犬戎祭公謀父諫

祭公魯內之國為王卿士謀父字也

曰

不可先王耀德不觀兵戢而時動動則威觀則

玩玩則無震

震懼也

先王之於民也茂正其德而

厚其性阜其財求而利其器用明利害之鄉

方鄉

也、以文修之使務利而避害懷德而畏威故能

保世以滋大昔我先王世后稷以服事虞夏奕

世載德不忝前人至于文王武王昭前之光明

舊無財
亦向利
其五字
補之

舊無有
小祀則
珍言六
子及注

而加之以慈和、事神保民，無不欣喜。商王帝辛大惡于民，庶民不怨，欣戴武王，以致戎于商牧。

非務武也，勤恤民隱，而除其害也。夫先王之制

此總言之也，侯

邦內甸服，邦外侯服，侯衛賓服。

侯圻、衛、衛圻

夷蠻要服，我狄荒服。甸服者祭，

祭也，侯服者祀

供月

賓服者享，

供時

要服者貢，

供歲

荒服者王。

詩云：莫敢不來王也。

日祭，月祀，時享，歲貢，終王。先王之順

祀，

外傳云：先王之訓也。

有不祭則脩意，

先修志意，以自責也。

有不祀

則修言，

言，號令也。

有不享則修文，

文，典法也。

有不貢則修

名

名謂尊卑職貢之名號也

有不王則修德

遠人不服則修文德以來之也

序成而有不至則修刑

序成謂上五者次序已成不至則有刑罰也

於是有刑不祭伐不祀征不享讓不貢告不王

於是有刑罰之辟有攻伐之兵有征討之備有

威讓之命有文告之辭布令陳辭而有不至則

增脩於德無勤民於遠是以近無不聽遠無不

服今犬戎氏以其職來王天子曰予必以不享

征之且觀之兵無乃廢先王之訓而幾頓乎王

遂征之得四白狼四白鹿以歸自是荒服者不

至諸侯有不睦者、厲王卽位、好利近榮夷公、芮
良夫諫曰、王室其將卑乎、夫榮公好專利而不
知大難、夫利、百物之所生也、天地之所載也、而
有專之、其害多矣、天地百物皆將取焉、何可專
也、所怒甚多、而不備大難、以是教王、王其能久
乎、夫王人者、將導利而布之上下者也、使神人
百物無不得極、極中也猶曰、怵惕懼怨之來、今王
學專利、其可乎、匹夫專利、猶謂之盜、王而行之、
其歸鮮矣、榮公有用、周必敗、王不聽、卒以榮公

爲卿士用事王行暴虐侈傲國人謗王召公諫

召穆公也

曰民不堪命矣王怒得衛巫

衛國之巫

使監謗

者以告則殺之其謗鮮矣諸侯不朝王益嚴國

人莫敢言道路以目

以目相眴而已

王喜告召公曰吾

能弭謗矣乃不敢言召公曰是鄣之也防民之

口甚於防水水壅而潰傷人必多民亦如之是

故爲水者決之使導爲民者宣之使言故民之

有口猶土之有山川也財用於是乎出猶其有

原隰衍沃也衣食於是乎生口之宣言也善敗

舊無出
猶土之
乎十四
字補之

於是乎興夫民慮之心而宣之口成而行之若
壅其口其與能幾何王不聽於是國莫敢出言
三年乃相與叛襲王王出奔于彘宣王卽位脩
政法文武成康遺風諸侯復宗周幽王嬖愛褒
姒欲廢后并去太子用褒姒爲后以其子伯服
爲太子褒姒不好笑幽王欲其笑萬方故不笑
幽王爲舉烽火諸侯悉至至而無寇褒姒乃大
笑幽王欲悅之爲數舉烽火其後不信益不至
王之廢后去太子也申侯怒乃與緡西夷犬戎

共攻王。王舉烽火徵兵，兵莫至，遂殺幽王驪山下。

秦繆公與晉惠公合戰，爲晉軍所圍。於是岐下食善馬者三百人，馳冒晉軍解圍，遂脫繆公而反，生得晉君。初，繆公亡善馬，岐下野人共得而食之者三百餘人，吏逐得，欲法之。繆公曰：「君子不以畜產害人，吾聞食善馬肉不飲酒傷人，乃皆賜酒而赦之。」三百人者聞秦擊晉，皆求從，從而見繆公窘，亦皆推鋒爭死，以報食馬之德。於

是繆公虜晉君以歸、我王使由余於秦、繆公示以宮室積聚、由余曰、使鬼爲之、則勞神矣、使人爲之、亦苦民矣、繆公怪之、問曰、中國以詩書禮樂法度爲政、然尚時亂、今我夷無此、何以爲治、不亦難乎、由余笑曰、此乃中國所以亂也、夫自上聖黃帝、作爲禮樂法度、身以先之、僅以小治、及其後世、日以驕淫、阻法度之威、以責督於下、下疲極、則以仁義怨望於上、上下交爭、怨而相篡弑、至於滅宗、皆以此類也、夫我夷不然、上含

淳德以遇其下、下懷忠信以事其上、一國之政、
猶一身之治、不知所以治、此真聖人之治也、於
是繆公退而問內史廖曰、孤聞隣國有聖人、敵
國之憂也、今由余賢、寡人之害、將奈何、廖曰、我
王處僻匿、未聞中國之聲、君試遣其女樂、以奪
其志、爲由余請、以疏其間、君臣有間、乃可虜也、
繆公曰、善、因以女樂二八、遺我王、我王受而悅
之、於是秦乃歸由余、由余數諫不聽、遂去降秦、
繆公以客禮禮之、用由余謀伐我王、益國十二、

開地千里、遂霸西戎、

秦始皇帝、莊襄王子也、名政、二十六年、初并天下、自號曰皇帝、事皆決於法、刻削無仁恩、收天下兵、聚之咸陽、銷以爲鐘、鑠金人十二、置廷宮中、每破諸侯、寫放其宮室、作之咸陽北坂上、

長在

安西北、別名渭城、

南臨渭、自雍門

在高陵縣

以東至涇渭、殿

屋複道、周閣相屬、所得諸侯美人、鐘鼓、以充入

之、三十二年、燕人盧生奏錄圖書曰、亡秦者胡

也、

胡、胡亥、秦二世名也、秦見圖書、不知此爲人名、反備北胡、

始皇乃使將軍

蒙恬發兵三十萬人北擊胡三十四年始皇置酒咸陽宮僕射周青臣曰他時秦地不過千里賴陛下神靈明聖平定海內日月所照莫不賓服以諸侯爲郡縣人人自安樂無戰爭之患傳之萬世自上古不及陛下威德始皇悅博士齊人淳于越進曰臣聞殷周王千餘歲封子弟功臣自爲枝輔今陛下有海內而子弟爲匹夫卒有田常六卿之臣無輔弼何以相救哉事不師古而能長久者非所聞也今青臣又面諛以重

陛下之過、非忠臣也。始皇下其議、丞相斯曰、五
帝不相復、三代不相襲、各以治、非其相反、時變
異也。今陛下創大業、建萬世之功、固非愚儒所
知也。且越言、乃三代之事、何足法也。今諸生不
師今而學古、以非當世、惑亂黔首。聞令下、則各
以其學議之、入則心非、出則巷議、率羣下以造
謗、如此弗禁、則主勢降於上、黨與成乎下、禁之
便。臣請史官非秦記皆燒之、天下敢有藏詩書
百家語者、悉詣守尉雜燒之、有敢偶語詩書者、

市

禁民聚語
畏其謗也

以古非今者族吏見知不舉與同

罪令下三十日不燒黥爲城旦若欲有學法令

以吏爲師三十五年作前殿阿房東西五百步

南北五十丈上可以坐萬人下可以建五丈旗

周馳爲閣道自殿下直抵南山表南山之顛以

爲闕爲複道自阿房渡渭屬之咸陽以象天極

閣道絕漢抵營室也隱宮徙刑者七十餘萬人

分作阿房宮或作驪山發北山石椁乃寫蜀荊

地材皆至關中計宮三百關外四百餘於是立

石東海上以爲秦東門、因徙三萬家驪邑、五萬家雲陽、皆復不事十歲、盧生說始皇曰、臣等求芝奇藥仙者、常弗遇、類物有害之者、人主所居、而人臣知之、則害於神、願上所居宮、無令人知、然後不死之藥、殆可得也、於是始皇乃令咸陽之旁二百里內宮觀二百七十、複道甬道相連、帷帳鐘鼓美人充之、案署不移徙、行所幸、有言其處者罪死、自是後莫知行所在、侯生盧生相與謀曰、始皇爲人、天性剛戾、以爲自古莫及已、

專任獄吏、獄吏得親幸、博士雖七十人、特備員、弗用、樂以刑殺爲威、天下畏罪持祿、莫敢盡忠、上不聞過而日驕、下懾伏謾欺以取容、天下之事、無小大皆決於上、貪於權勢至如此、未可爲求仙藥、於是乃亡去、始皇聞亡、乃大怒曰、盧生等、吾尊賜之甚厚、今乃誹謗我也、諸生在咸陽者、或爲詆言、以亂黔首、於是使御史悉案問諸生、諸生傳相告引、犯禁者四百六十餘人、皆坑之咸陽、使天下知之以懲後、長子扶蘇諫、始皇

怒使扶蘇北監蒙恬於上郡三十六年、熒惑守
心、有墜星下東郡、至地爲石、黔首或刻其石曰
始皇帝死而地分、始皇聞之、遣御史逐問、莫服、
盡取石旁居人誅之、三十七年、始皇出遊、丞相
斯、少子胡亥從、至平原津而病、病益甚、乃爲璽
書、賜公子扶蘇曰、與喪會咸陽而葬、始皇崩、趙
高乃與胡亥、李斯陰謀、更詐爲始皇遺詔、立子
胡亥爲太子、賜扶蘇蒙恬死、

二世皇帝元年、趙高爲郎中令、掌宮殿門戶、任用事、

二世與高謀曰、先帝巡行郡縣以示強、威服海內、今晏然不巡行、卽見弱、無以臣畜天下、二世東行郡縣、遂用趙高、乃陰與高謀曰、大臣不服、官吏尚強、及諸公子必與我爭、爲之奈何、高曰、臣固願言、而未敢也、先帝之大臣、皆天下累世名貴人也、積功勞、世以相傳久矣、今高素小賤、陛下幸稱舉、令在上位管中事、大臣鞅鞅、特以貌從臣、其心實不服也、今上出、不因此時案郡縣守尉有罪者、誅之、上以振威天下、下以除上

生平所不可者、今時不師文而決於武力、願陛下
遂從時無疑、卽羣臣不及謀矣、明主收舉餘
民、賤者貴之、貧者富之、遠者近之、則上下集而
國安矣、二世曰善、乃行誅大臣及諸公子、以罪
過連逮、無得立者、而六公子戮死於杜、羣臣諫
者、以爲誹謗、大吏持祿取容、黔首振恐、戍卒陳
勝等反、山東郡縣皆殺其守尉、令丞反以應陳
涉、不可勝數也、謁者使東方來、以反者聞、二世
怒下吏、後使者至上、問對曰、羣盜郡守尉方逐

萬無無
乃亦誅
之半補

捕今盡得不足憂上悅三年章邯等圍鉅鹿邯
等數却二世使人讓邯邯使長史欣請事趙高
弗見又弗信欣恐亡去欣見邯曰趙高用事於
中將軍有功亦誅無功亦誅邯等遂以兵降諸
侯趙高欲爲亂恐羣臣不聽乃先設驗持鹿獻
於二世曰馬也二世笑曰丞相誤耶謂鹿爲馬
問左右左右或言馬以阿順趙高或言鹿高因
陰中以法後羣臣畏高高前數言關東盜無能
爲及項羽虜將王離等自關以東大氏盡叛高

恐二世怒誅及其身、乃謝病不朝見、二世夢白虎齧其驂馬殺之、心不樂、怪問占夢、卜涇水爲祟、二世乃齊望夷宮、欲祠涇沈四白馬、使使責讓高以盜賊事、高懼、乃陰與其婿咸陽令閻樂、其弟趙成謀、使郎中令爲內應、詐爲有大賊、令樂召發吏卒追樂、將吏卒千餘人至望夷宮前、卽二世數曰、足下驕恣誅殺無道、天下叛足下、足下其自爲計、二世曰、丞相可得見否、樂曰、不可、二世曰、吾願得一郡爲王、弗許、又曰、願爲萬

戶侯弗許曰願與妻子爲黔首比諸公子閻樂
曰臣受命於丞相爲天下誅足下足下雖多言
臣不敢報二世自殺趙高乃立二世之兄子公
子嬰爲秦王令子嬰齋當廟見受玉璽齋五日
子嬰稱病不行高自往曰宗廟重事王奈何不
行子嬰遂刺殺高於齋宮三族高家以徇咸陽
子嬰爲秦王四十六日沛公破秦軍至霸上子
嬰奉天子璽符降軹道旁諸侯兵至項籍殺子
嬰及秦諸公子宗族遂屠咸陽燒其宮室虜其

子女收其珍寶貨財諸侯共分之

太史公曰秦自穆公以來稍蠶食諸侯竟成始皇始皇自以爲功過五帝地廣三王而羞與之侔足已不問遂過而不變二世受之因而不改暴虐以重禍子嬰孤立無親危弱無輔三主惑而終身不悟亡不亦宜乎當此時也世非無深慮知化之士也然所以不敢盡忠拂過者秦俗多忌諱之禁忠言未卒於口而身爲戮沒矣故使天下之士傾耳而聽重足而立鉗口而不言

是以三主失道、忠臣不敢諫、智士不敢謀、天下已亂、姦不上聞、豈不哀哉！先王知雍蔽之傷國也、故置公卿大夫士、以飭法設刑、而天下治、其強也、禁暴誅亂、而天下服、其弱也、五伯征而諸侯從、其削也、內守外附、而社稷存、故秦之盛也、繁法嚴刑、而天下振、及其衰也、百姓怨而海內叛矣、故周得其道、千餘歲不絕、秦本末並失、故不長久、由此觀之、安危之統、相去遠矣、野諺曰、前事之不忘、後事之師、是以君子爲國、觀之上

古驗之當世、參以人事、察盛衰之理、審權勢之
宜、去就有序、變化應時、故曠日長久而社稷安
矣、秦孝公據殽函之固、擁雍州之地、君臣固守、
而窺周室、有席卷天下、包舉宇內、囊括四海之
意、并吞八荒之心、當是時、商君佐之內、立法度、
務耕戰、修守戰之備、外連衡而闘諸侯、於是秦
人拱手而取西河之外、惠王武王蒙故業、因遺
冊、南兼漢中、西舉巴蜀、東割膏腴之地、收要害
之郡、諸侯恐懼、會盟而謀弱秦、不愛珍器重寶

肥美之地、以致天下之士、合從締交、

締結也、

相與

爲一、當是時、齊有孟嘗、趙有平原、楚有春申、魏有信陵、此四君者、皆明智而忠信、寬厚而愛人、尊賢而重士、約從離衡、并韓魏、燕趙宋衛中山之衆、於是六國之士、有寧越、徐尚、蘇秦、杜赫之屬、爲之謀、陳軫、樓緩、蘇厲、樂毅之徒、通其意、吳起、孫臏、田忌、廉頗之朋、制其兵、常以十倍之地、百萬之衆、叩關而攻秦、秦人開關延敵、九國之師、逡巡而不敢進、秦無亡矢遺鏃之費、而天下

諸侯已困矣，於是從散約解，爭割地而奉秦。秦有餘力，而制其弊，因利乘便，宰割天下，分裂河山。強國請服，弱國入朝。及至秦王，續六世之餘

烈

孝公惠文王武王昭王孝文王莊襄王

振長策而御宇內，吞二

周而亡諸侯，履至尊而制六合，執棣拊

拊拍也一作僞

朴以鞭笞天下，威振四海。南取百越之地，北築

長城，胡人不敢南下而牧馬，士不敢彎弓而報

怨。於是廢先王之道，焚百家之言，以愚百姓，隳

名城，殺豪俊，收天下之兵，聚之咸陽，銷鋒鑄鐻，

以爲金人十二以弱黔首之民然後斬華爲城

斷華山爲城也因河爲津據億丈之城臨不測之谿以

爲固良將勁弩守要害之處信臣精卒陳利兵

而誰何何猶問也秦王之心自以爲關中之固金城

千里子孫帝王萬世之業也秦王旣沒餘威振

殊俗陳涉甞牖繩樞之子以繩繫戶樞也亡隸之

人民也才能不及中人非有仲尼墨翟之賢陶朱

猗頓之富躡足行伍之間出偏起什佰之中首出

十長佰長中也率疲散之卒將數百之衆斬木爲兵揭

竿爲旗、天下雲集響應、贏糧而景從、山東豪俊

遂並起而亡秦族矣、且夫天下非小弱也、雍州

之地、殽函之固、自若、陳涉之位、非尊於齊楚韓

魏之君、鉏耰棘矜、以鉏柄及棘作矜、非鏖於長

鎗矛戟、長矛也、適戍之衆、非抗於九國之師、深謀

遠慮、行軍用兵之道、非及向時之士也、然而成

敗異變、功業相反、試使山東之國、與陳涉度長

絜大、絜束之絜、比權量力、則不可同年而語矣、然秦

以區區之地、千乘之權、招八州而朝同列、百有

餘年矣。然後以六合爲家，殽函爲宮。一夫作難，而七廟隳，身死人手，爲天下笑者，仁義不施而攻守之勢異也。秦兼諸侯，南面稱帝，天下之士斐然向風。元元之民，冀得安其性命，莫不虛心而仰上。當此之時，守威定功，安危之本在於此矣。秦王懷貪鄙之心，行自奮之智，不信功臣，不親士民，廢王道，立私權，禁文書而酷刑法，先詐力而後仁義，以暴虐爲天下始，孤獨而有之，故其亡可立而待。借使秦王計上世之事，並殷周

之迹以制御其政、後雖有淫驕之主而未有傾
危之患也、故三王之建天下、名號顯美、功業長
久、今秦二世立、天下莫不引領而觀其政、夫寒
者利短褐、也、小襦而飢者甘糟糠、天下之嗷嗷斯
新主之資也、此言勞民之易爲仁也、向使二世
有庸主之行、而任忠賢、臣主一心、而憂海內之
患、綢繆而正先帝之過、裂地分民、以封功臣之
後、建國立君、以禮天下、虛囹圄而免刑戮、除去
收帑汙穢之罪、使各反其鄉里、發倉廩、散財幣、

以振孤獨窮困之士、輕賦少事、以佐百姓之急、約法省刑、以持其後、使天下之人皆得自新、更節修行、各慎其身、塞萬民之望、而以威德與天下、天下集矣、卽四海之內皆謹然各自安樂其處、唯恐有變、雖有狡猾之民、無離上之心、則不軌之臣、無以飾其智、而暴亂之姦止矣、二世不行此術、而重之以無道、更始作阿房之宮、繁刑嚴誅、賦歛無度、天下多事、百姓困窮、然後姦僞並起、而上下相遁、蒙罪者衆、而天下苦之、自君

不立

令不行則政不立也

今天子建諸侯立其少是教民

逆也

若不從之諸侯効之王命將有所壅

言先王立

長之命將壅塞不行也

若弗從而誅之是自誅王命也

先王

之命立長今魯亦立長若誅之是自誅王命也

誅之亦失不誅亦失

誅之

則王命廢也

王其圖之弗聽卒立戲為太子是

為懿公括之子伯御弑懿公宣王伐魯殺伯

御自是後諸侯多叛王命

燕昭王於破燕之後即位昇身厚幣以招賢者

諸郭隰曰齊因孤之國亂而襲破燕孤極知燕

小力少不足報、然得賢士與共國、以雪先王之耻、孤之願也、先生視可者、得身事之、郭隗曰、王必欲致士、先從隗始、況賢於隗者、豈遠千里哉、於是昭王爲隗改築宮而師事之、樂毅自魏往、鄒衍自齊往、劇辛自趙往、士爭趨燕、燕王遂以樂毅爲上將軍、與秦楚三晉合謀以伐齊、齊兵敗、湣王出亡於外、燕兵獨追北、入至臨淄、盡取齊寶、燒其宮室宗廟、齊城之不下者、唯獨聊莒、卽墨、其餘皆屬燕、昭王卒、惠王爲太子時、與樂

毅有隙、及卽位、疑毅、使騎劫代將、樂毅亡走趙、齊田單以卽墨擊敗燕軍、騎劫死、燕兵引歸、齊悉復得其故城、

微子開者、紂之庶兄也、紂旣立、不明、淫亂於政、微子數諫、箕子者、紂親戚也、紂爲象箸、箕子歎曰、彼爲象箸、必爲玉杯、爲玉杯、則必思遠方珍怪之物而御之矣、與馬宮室之漸、自此始、不可振也、紂爲淫佚、箕子諫不聽、乃被髮詳狂、王子比干見箕子諫不聽、乃直言諫、紂怒曰、吾聞

聖人之心有七竅、信有諸乎、乃遂殺王子比干、
刳視其心、微子曰、人臣三諫、不聽、則其義可以
去矣、於是遂行、周公誅武庚、乃命微子代殷後、
奉其先祀曰宋、

唐叔虞者、周成王弟也、成王與叔虞戲、削桐葉
爲珪、以與叔虞、曰、以此封若、史佚因請擇日立
叔虞、成王曰、吾與之戲耳、史佚曰、天子無戲言、
言則史書之、禮成之、樂歌之、於是遂封叔虞於
唐、

舊唐書
字補之

趙烈侯好音、謂相國公仲連曰、寡人有愛、可以
貴之乎、公仲曰、富之可、貴之則否、烈侯曰、然、夫
鄭歌者、槍石二人、吾賜之田、人萬畝、公仲曰、諾
不與、居一月、烈侯從代來、問歌者田、公仲曰、求
未有可者、有頃、烈侯復問、公仲終不與、乃稱疾
不朝、番吾君常山有番吾縣自代來、謂公仲曰、君實好
善、未知所持、今公仲相趙、於今四年、亦有進士
乎、公仲曰、未也、番吾君曰、牛畜、荀欣、徐越皆可、
公仲乃進三人、及朝、烈侯復問歌者田何如、公

仲曰、方使擇其善者、牛畜侍烈侯以仁義、約以王道、明日荀欣侍、以選練舉賢、任官使能、明日徐越侍、以節財儉用、察度功德、所與無不充、君悅、烈侯使使謂相國曰、歌者之田且止、官牛畜爲師、荀欣爲中尉、徐越爲內史、賜相國衣二襲、單複具爲一襲也、

魏文侯受子夏經藝、客段干木、過其閭、未嘗不軾也、秦嘗欲伐魏、或曰、魏君賢人是禮、國人稱仁、上下和合、未可圖也、文侯由此得譽於諸侯、

文侯謂李克曰、先生嘗教寡人曰、家貧則思良

妻、國亂則思良相、今所置非成則璜、

文侯弟名成也

二

子何如、對曰、君不察故也、居視其所親、富視其所與、達視其所舉、窮視其所不爲、貧視其所不取、五者足以定之矣、何待克哉、文侯曰、寡人相定矣、李克曰、魏成子爲相矣、翟璜忿然作色曰、以耳目之所睹記、臣何負於魏成子、西河之守、臣之所進也、君內以鄴爲憂、臣進西門豹、君謀欲伐中山、臣進樂羊、中山已拔、無使守之、臣進

先生君之子無傳、臣進屈侯鮒、臣何以負於魏
成子、李克曰、且子之言克於子之君者、豈將比
周以求大官哉、且子安得與魏成子比乎、魏成
子以食祿千鍾、什九在外、什一在內、是以東得
卜子夏、田子方、段干木、此三人者、君皆師之、子
所進五人者、君皆臣之、子惡得與魏成子比也、
翟璜遂巡再拜曰、璜鄙人也、失對、願卒爲弟子
矣、

齊威王初卽位、九年之間、諸侯並伐、國人不治、

於是威王召卽墨大夫語之曰、自子之居卽墨也、毀言日至、然吾使人視卽墨、田野開、民人給、官無留事、東方以寧、是子不事吾左右以求譽也、封之萬家、召阿大夫語之曰、自子之守阿、譽言日聞、然使使視阿、田野不開、民貧苦、昔日趙攻甄子、弗能救、衛取薛陵、而子弗知、是子以幣厚吾左右以求譽也、是日烹阿大夫、及左右嘗譽者、皆并烹之、遂起兵西擊趙、衛、敗魏於濁澤、於是齊國震懼、人人不敢飾非、務盡其誠、齊國

大治諸侯聞之莫敢致兵於齊二十四年與魏王會田於郊魏王問曰王亦有寶乎威王曰無有梁王曰若寡人國小也尚有徑寸之珠照車前後各十二乘者十枚奈何以萬乘之國而無寶乎威王曰寡人之所以爲寶與王異吾臣有檀子者使守南城則楚人不敢爲寇東取泗上十二諸侯皆來朝吾臣有盼子者使守高唐則趙人不敢東漁於河吾吏有黔夫者使守徐州則燕人祭北門趙人祭西門

齊之北門西門也言燕趙之人畏見

受伐故祭以永福也徙而從者七千餘家吾臣有種首者
使備盜賊則道不拾遺將以照千里豈特十二
乘哉梁惠王慙不懌而去

羣書治要卷第十一